

雙

槐

歲

抄

雙槐歲抄卷第二

國初三都

洪武元年八月

詔以大梁爲北京金陵爲南京南京既立

宗社建宮室定朝市北京有司次第舉行三年改臨濠府爲中立府定爲中都築新城在臨濠府舊城西二十里於新城內營皇城皇城內有萬歲山南有四門曰午門玄武東華西華建宮殿立

宗廟太社并置中書省大都督府御史臺于午門東西新城門十有二洪武朝陽玄武塗山父道子順

長春長秋南左甲第北左甲第前右甲第後右甲第於洪武門外立圓丘於左甲第門外立方丘與南北二京爲三都其後北京罷不建七年十月改中立府爲鳳陽徙府治于新城即舊會同館爲之賜名鳳陽府者在鳳凰山之陽也迨永樂中建北京于燕竟成

聖祖之志而三都備矣昔漢光武以南陽舊宅爲南都故張衡作三賦西京東京南都是也近世李學士時勉陳侍講敬宗皆作北京賦而南京中都反不之及豈所以闡揚洪業昭示萬世者與後有作

者追蹤周雅歌詠岐周豐鎬之義雖賦三都可也

中都閱武

蜀獻王諱椿

高皇帝第十子也最有賢德博通經藝旁及內典  
上所鍾愛既封呼爲蜀秀才洪武十八年冬十月

命王閱武于中都長史太原王仲禮等隨侍蓋中都  
乃

上故鄉寔龍興重地也王至中都首闢西堂以讀

書自娛閱武餘暇日與儒生探曠經史商確異同

沉潜玩味殆忘寢食時翰林編修李叔荆掌中都

國子監事大被親寵明年揭忠孝爲藩四大字以  
自警又明年四月召詩文名僧來復與之講論因  
諭作四箴以自警曰正心曰觀道曰崇本曰敬賢  
來復爲之箴焉又明年戊辰春建寶訓堂于殿之  
西尊奉祖訓錄于中先代帝王大經大典咸列于  
左亦令來復記之會叔荆被命與前編修致仕  
蘇伯衡爲會試主考伯衡告歸金華

王召之至中都入見西堂館于國學者踰月講道論  
文殆無虛日且又勸學延師給以廩食教育扈衛  
百官子弟之俊秀者俾各有成立上聞而益愛

之二十二年己巳春遣使召還其年遂之國云  
來復字見心豫章人有蒲庵集國子祭酒李鴻漸  
司業劉丞直皆求爲記師儒且然其重名可知矣

朝會紀事

北平劉憲副崧自紀朝會事云洪武六年秋予承  
乏副北平憲迨九年閏九月幸及一考以十一月  
赴觀明年正月至京則朝廷更制内外官率  
九年爲任又聞有

旨召各道按察司官以三月會京師予以留滯道次  
弗知也是月十有一日子齋所書事蹟赴考功監

投進監在奉天門之西南上其導之進者則殿廷儀禮司正也越三日吏部尚書王敏於大本堂啓云北平按察司副使劉崧以考滿至京未經注代俾往復任今宣諭在邇宜令聽候者 東宮可之越二月十八日僉事閻裕等至自四川未幾廣東西道及凡任各道司官者皆次第至二十七日北平僉事徐叔銘經歷王敬修知事俞思敬與山西副使楊基江西副使周凱山東副使張孟兼等又皆至又明日監察御史權河南司官董哲與浙江廉使余奎等又最後至皆集于會同館凡四十有

九人其始至皆齋沐具朝冠朝服以次日早引奏如儀行朝覲禮至是始齊同焉前期儀禮司正戒各道官率所屬入聽宣諭乃二十九日早朝既退衆各常服俟于闕門之西外時中書丞相胡惟庸大都督府官毛某御史臺左大夫汪廣洋右大夫陳寧皆先入文武百官從之既而司正引衆班循闕右西側門以入奉天門復由門之右掖進奉天殿下叙列于丹墀之西以俟俄而中使趣召知

上已陞殿矣司正與序班導衆由殿右歷西階折而東行遙望見金刺紋團鳳扇夾御座正南面北位

乃循殿廷西南遂班于正南北面立最在前者應使一人次則副使四人廣西僉事顏繼先陝西僉事韓宜可等數人與經歷等四十四人作重行立又次其後奉天殿新成土木䟽樸未甃飾也

上冠通天冠御白袍負山字金漆素木屏風據金椅下施葦席焉

天顏清怡玉音暢亮宣諭丁寧繼以戒勅特命戶部尚書僕斯以官段四表裏賜余奎賞其前在山東時實封言事剴切云宣諭畢衆惶恐再拜叩首謝而退又明日爲三月朔旦司正具戒入辭衆復具

朝冠服隨序班先俟立于奉天殿之前墀

上既升御座司正以聞乃就位贊拜禮畢趨退由奉  
天門未竟有旨召復入而前行者已出赴儀禮  
司收服矣後行者聞命將復入不可乃亟出易服  
仍羣趨以入時工匠方集殿墀頗喧雜上厭之

乃徐步出殿門降庭陛以臨于丹墀將坐見臣等  
且還至乃直南趨出奉天門度金水橋又趨午門  
以出至御街中甬道而坐百官衛士環擁後先而  
儀仗嚴肅特甚衆俛伏喘汗戰慄不知所爲

上始若色怒久之乃言曰若等知朕所以諭之意否

乎今天下太平有司膺名秩食俸祿甚厚而民隱未盡昭恤使朕之耳目弗究于下者非若等責歟惟是新制九年考績若等其各還司以糾以察慎乃憲度大者以聞可也毋玩民事毋干天紀使後此能復見朕則若等爲奉職矣是日 聖訓諄復視前日尤嚴切焉拜辭禮畢 上將起復立而申飭者再四暨返駕將入午門忽返顧曰若等其偕來 上既入乃自東廂以登于觀 上遂入坐南殿群臣登自西廂遂列憇于殿之右掖陳几席焉云有 旨賜膳既而光祿寺設饌酒三行進膳畢

司正奏按察司官謝賜膳 勅免謝乃退詣中書  
省及府臺以次辭謝而出又明日齎兵部符驗出  
金川門赴龍江驛次第起船以歸寔是月之四日  
也舟行凡十有九日始達北平追錄前所會憲官  
之爵里姓字爲一帙以識好會也

聖祖之親近外臺戒敕諄至如此天下安得不治然  
禮制近古迥與今異故錄之以備考云

西域曆書

漢律曆志曰三代既沒五伯之末史官喪紀疇人  
子弟分散或在夷狄夷狄之有曆亦自中國而流

者也然東夷北狄南蠻皆不聞有曆而西域獨有之蓋西域諸國當崑崙之陽於諸夷中為得風氣之正故多異人若天竺梵學婆羅門伎術皆西域出也自隋唐以來已見於中國今世所謂回回曆者相傳為西域馬可之地年號阿刺必時異人馬哈麻之所作也以今考之其元實起於隋開皇十九年己未之歲其法常以三百五十日為一歲歲有十二宮宮有閏日凡百二十有八年閏三十有一日又以三百五十四日為一周周有十二月月有閏日凡三十年閏十有一日歷千九百四十一

年而宮月甲子再會其白羊宮第一日日月五星  
之行與中國春正定氣日之宿直同其用以推步  
分經緯之度著陵犯之占曆家以爲最密元之季  
世其曆始東逮我

高皇帝之造大統曆也得西人之精乎曆者於是命  
欽天監以其曆與中國曆相參推步迄今用之今  
按歲之爲義於文從步從戌謂推步從戌起也白  
羊宮於辰在戌豈推步自戌時見星爲始故與

御製文集有授翰林編修馬沙亦黑馬哈麻敕文謂  
大將入胡都得祕藏之書數十百冊乃乾方先聖

之書我中國無解其文者聞爾道學本宗深通其理命譯之今數月測天之道甚是精詳時洪武壬戌十二月也二人在翰林凡十餘年豈所譯者即此曆書與當埃知者攷諸

國子試魁

洪武甲子重定科舉之制即今三場程式也是科京闈國子監生爲魁且中者居半九月

聖祖命禮部尚書任昂各出榜於原籍以榮耀之自此科舉日重非由此進者不至大用矣次年乙丑會試翰林待詔朱善前助教聶鉉爲考試官取中

式四百七十二人黃子澄第一練子寧次之皆監

生也第三名花綸乃浙江新解首自餘監生前列

者多上喜甚陞善爲文淵閣大學士欲用鉉鉉

固辭乞教諭俸許之及殿試有司奏綸第一子

寧次之子澄又次之先一夕上夢殿前一鐵鉅

釘掇白絲數縷悠颺日下覺以語左右莫知其爲

何祥及拆狀元卷乃花綸也上嘆其不叶夢取

第二人爲首已而得丁顯卷姓名與夢相符遂擢

爲狀元顯時年二十八子寧次之綸又次之三人

皆拜脩撰而第二甲馬京齊麟爲編脩吳文及三

甲蔡福南爲檢討子澄抑置三甲與顧觀爲翰林庶吉士父之子澄亦授脩撰云或傳童謠曰黃練花花練黃上惡其語以綸及子澄年少高科故抑之也顯字彥偉建陽人德業文章無聞焉嘗得其題蘭窓詩云公子善居室猗蘭蔚東窓素榮浥輕露冷風振芬芳流玩引日夕恍若臨沅湘豈不艷桃李懿茲王者香况逢同心友結佩森翱翔嘉名既云錫詠言列篇章持謝二三子德馨尚無忘顯後獲譴歸終於脩撰而綸改福建道監察御史出按江西坐罪不令終云

聖旨立坊

洪武戊辰會試以蘇伯衡及李叔荆爲考試官得京闈新解首施顯爲第一人謂傳臚必復叶

上前夢矣及取狀元乃監生任亨泰也

聖祖寵遇特隆有旨命有司建狀元坊以旌之

聖旨建坊自此始也亨泰襄陽人爲修撰每召建議即賜手詔書襄陽任而不名尋與黃子澄並拜詹事府少詹事仍兼修撰已而擢禮部尚書奉使交趾後左遷監察御史十三歲時嘗題扇面云杲日初升萬木低盡船撐出小樓西先生正熟朝天

夢門外山禽莫亂啼其貴達也人以此詩預占之

兩魁天下

洪武二十四年辛未二月天下貢士會試者六百

六十有奇中式者許觀貴池人監生書張徽絳州

人監生易蔡禎嘉定州人監生詩王羽杭州府學

生春秋胡泰南昌縣人監生書林惟和晉江縣學

生易陳裕寧波府學生詩賀守真攸縣學生書董

恭禮鄞縣學生易龍子鈞吉安府學生詩李謙充

州府學生春秋丘秬餘干縣學生禮記葉林蕭山

縣學生書李士昌定州人監生易李容同安縣學

生詩李儀鄒平縣人監生書何測瓊州府學生易

楊璧海陽縣人監生書吳言信邵武縣人抄鈔局

副使詩張顯宗寧化縣人監生春秋陳觀永福縣

學生易丁仁東平州人監生詩林義莆田縣學生

書張廣揚德慶州人監生易陳伯顏衢州府學生

詩李本寧晉縣學生書徐遜杭州府學生易賈閔

崇德縣學生詩王觀錢塘縣學生春秋趙良淇縣

學生禮記凡三十一人蓋二十而取一也入對

大廷觀復第一 國朝兩魁天下者自觀始時年二

十八張顯宗次之吳言信又次之 上以連科狀

元皆出太學召祭酒宋訥面褒諭焉水東日記謂顯宗爲狀元非也自乙丑以來進士多有爲縣丞者是年登科絕少

上乃擢下第舉人張孟鏞等俱授主事蓋特恩也觀後復姓黃官至少宗伯死於靖難其妻翁氏夫人暨二女亦死節云可謂不負魁名矣惜製作散逸世傳其酬張隱君詩云漫批華什咀餘甘欲報瓊瑤愧不堪一自返舟膠邑後幾回飛夢石湖南鶯花敢續春吟句燈火空陪入夜酣茶氣拂簾清晝午想應賓主正高談氣槩不類其爲人蓋鴈本

也

### 海定波寧

鄞人單仲友以能詩名洪武中徵至京師獻詩稱  
旨得備顧問因言本府名明州與國號同請

上易之

上徐思曰汝言是也復詢仲友山川讖緯

之詳仲友對曰昌國縣舟山之下舊有狀元橋蓋

讖言故云而童謠謂狀元出定海此最爲異以臣

觀之二邑素無穎異材豈將有待邪上聞定海

之名喜曰海定則波寧是宜改名寧波時洪武十

四年也迄二十年省昌國併入定海二十七年縣

人張信果應其讖蓋信即昌國在城人也信既狀  
元及第自修撰進侍讀時韓王安王靖江王以  
幼小俱在文淵閣講學偶與右贊善王俊華司憲  
及韓安二府長史蕭章同坐觀杜詩絕句云舍下  
筍穿壁庭中藤刺簷地晴絲冉冉江白草纖纖章  
舉以爲問俊華曰此蓋傷唐室衰微有所爲而作  
觀其無題可見矣信曰是時與貞觀之風大異宜  
有此詩已而諸王至言奉旨各寫古詩一首呈  
覽信即以此詩與韓王寫去御覽大怒韓王曰  
張信教兒寫耳上由是惡之二十九年二月同

編修戴彝瞻 勅諭女戶百戶藁進呈奉 旨增

二語信還文淵閣寫成仍舊弗增彝勸信改易不  
從謂曰事涉欺罔禍可既乎三十年三月坐覆閱  
會試落卷以不堪文字奏進與章等同誅而彝獲  
免云按是科學士劉三吾為會試考官取會元彭  
德陝西鳳翔人與兵部主事齊德並改名泰而信  
及第之下有真寧景清奉化戴德彝德彝亦去德  
止名彝蓋奉 上命也烏虜人臣事君以不欺為  
本信之掇禍如此豈足以貴山川應謹識也哉

丁丑再試

洪武丁丑會試考試官學士劉三五安府紀善寶  
坻自信稻取宋琮等五十一人中原西北士子無  
登第者入對 大廷 賜進士及第閩縣陳郊為  
首吉安尹昌隆次之會稽劉諤又次之被黜落者  
咸以為言 上大怒下 詔命儒臣再考下第卷  
中擇文理優長者復其科第於是侍讀定海張信  
侍講奉化戴彝春坊右贊善寧海王俊華平度司  
憲右司直郎永嘉張謙司經局校書瑞安嚴叔載  
正字樂安董貫二府長史惠安黃章韓府紀善無  
錫周衡靖江府紀善吉水蕭楫及陳郊等首甲三

人受命人各閱十卷或聞三吾與信稻至其所  
囑以卷之最陋者進呈上益怒章進一卷答君  
臣同遊策有曰貴而在上者君也賤而在下者臣  
也貴以臨賤賤以承貴叔載進易義有曰一氣交  
而歲功成上曰君臣同遊本爲君明臣良以成  
千載一時之盛今言貴賤正譏如今臣下犯罪不  
復寬容矣陰陽必二氣乃交感今日一氣交則獨  
陽不生孤陰不成誠爲悖理於是取六十一人  
殿試再賜策問以山東韓克忠爲首六月辛巳朔  
也先是丙子春上命翰林院官三吾及張信等

詹事府官司憲王俊華張謙嚴叔載董貫及黃章等編纂歷代帝王凡三百君除伏羲至帝嚳世遠史不詳載自帝堯至元順帝三千七百餘年行事善可爲法惡可爲戒者提其精要列註各君之下一覽事跡粲然易曉至是年四月撰述漢武帝以長安獄中有天子氣遣使詣郡邸獄罪無輕重皆殺之丙吉治獄拒不納上見之以其譏誅胡黨也因命刑部考訊諸閱卷者併祭酒楊淞皆出胡黨惟三吾信稻及司憲爲藍黨彙及昌隆不與併宥三吾餘皆磔戮郊諤進卷不行明白用筆此直

有惑 聖覽吏部奏發威虜安置四月初二日  
恩宥取回郊降鴻臚寺司賓署丞諤降司儀署丞已  
而御史劾奏皆連坐以死而彝及昌隆竟免焉詳  
載薄福不臣榜中宋琮者字萬鍾吉安泰和人時  
已拜御史黜爲教官後又入爲給事中左遷刑部  
檢校以明周易嘗同考會試擢南京國子助教九  
年考滿陞翰林檢討仍行助教事改任北監至正  
統庚申九月致仕時年七十五歸鄉又數年乃卒  
門人尚書劉廣衡謂其能脫刑僇享遐齡云

劉學士

劉學士三吾者長沙之茶陵人洪武甲子以儒士  
舉保赴京乙丑除授左春坊贊善戊辰九月

上御製洪範註成命序其後 聖覽批曰理道精詳

始終無疵暢然哉由是陞學士辛未三年考滿吏  
部以老不稱職奏請降黜 上宥之給與半俸時

年七十九矣明年 東宮憐其老令支全俸亦不

辭也癸酉二月外孫單慶以府軍前衛千戶坐藍

玉逆黨伏誅女良玉黥刺發漿糲房三五吾坐是閒

住明年九月還職乙亥奉 旨教趙署令子暹等

寫字不如法使虎口握筆寫母字先從右起

上詰之則對曰此王羲之趙子昂書法也出對句去

江面魚拋尺又以御製詩句爲對句使難爲辭

上益惡其奸滑至是坐考官得罪上特宥罪謫戍

焉嘗得其文集有三事皆可以徵聖政者其一

曰武昌于子仁者洪武乙丑進士改叅軍府庶吉

士出丞郟縣改山東之昌樂任滿耆老保留卽陞

知縣爲丞時同舊令入覲令坐不賑民飢當死乃

誣子仁子仁實未到官會設總里長吏證子仁當

連坐察司閱牘永無押字當還職吏之母訴丞今

爲令若還署妾之子願斬首法司曲議丞已在任

當如其吏罪大理駁之令不聽丞言故丞不押字  
安得與吏同罪竟得還署方欲行邑簿以貪墨繫  
都察院更誣子仁子仁與對簿又服罪

上聞之召謂曰汝清強吏也賞賚之使還昌樂抵任  
未久青州官匠逋在昌樂子仁械致青州事相連  
及刑部行提於是耆老六十七人條列子仁治狀  
以聞 上察知子仁廉明凡所得罪非同察污鱗  
則旁累見逮即陞青州知府賜衣一襲寶鈔二十  
錠其二曰洪武癸酉麗水何叔川知欽州所屬長  
燉鎮官林佛祖盤詰擒獲守禦百戶胡全之子與

家人私販番貨胡椒十八裹解人及椒至州時叔川方遣人迓其屬全令軍吏楊春賄以白金十八兩請免械送叔川拒不從竟械繫併所賄送廣東道御史問理既得實發審大理引奏

上喜其廉能依律犯者處斬仍籍全家銀兩悉賞叔川其三曰沈萬三名富字仲榮其弟萬四名貴字仲華本吳興之南潯人父祐始徙姑蘇長洲之東蔡村人以汙萊歸之祐躬率子弟服勞糞治有方渚洩有法由是富埤素封洪武中萬三萬四率先兩浙大戶輸稅萬石仍獻白金五千兩以佐用度

上命其造廊房爲楹六百五十披甲馬軍者十務罄  
所獻金乃已自是被人告訐或旁累所逮徃徃曲  
宥尋命選大戶家爲京官六曹令近侍舉所知惟  
萬四有孫曰玠擢戶部倉曹員外郎受官辭祿  
上益器重之玠父漢傑始徙家化周莊焉

聖祖之契庶能勵富室如此吏安民懷開太平於萬  
世信有由哉

### 邑俊升郡學

國初有司考較邑學俊髦升入郡學吾香山周尚  
文林茂皆其選也二人於經術外皆攻詩尚文讀

書番山嘗見鬼魅一夕其族兄來訪與言昨宿有  
笑人來與聯句成卷有云盡日倚闌人不到謾聽  
鶯語到黃昏兄笑曰此真鬼詩也因携卷去倏然  
不見訊之鄉人族兄在家未嘗出也即昨鬼復至  
明矣人以爲魁兆尋第進士筮仕不終豈鬼豫欺  
之歟茂嘗詠松云大夫真氣甞曾不受秦封又詠  
桂云姮娥如會意分我一枝秋茂後中鄉試官終  
五品蓋詩識也

孝義家

書曰凡厥正人既富方穀洪武中用稅戶人材

高皇帝由此道也時湖州富民嚴震直官至尚書其  
次丘顯及湯行之屬甚衆惟金華浦江義門鄭氏  
爲特異其先曰綺者有絕德父照坐死罪上疏郡  
守錢端禮請以身代端禮察之白其誣母張病風  
孿綺抱持若嬰兒三十年不懈傳至文嗣六世同  
居二百年咸如綺在時元至大四年旌表門閭文  
嗣没大和司家事嚴而有恩凜如公府子弟小有  
過頒白者猶鞭之每遇歲時大和坐堂上群從子  
皆盛衣冠鴈行立左序下以次進拜跪奉觴上壽  
畢皆肅容拱手自右趨出足武相銜無敢參差者

輿論謂有三代風子孫從化馴行孝謹執親喪哀  
戚甚三年不御酒肉食貨田賦之屬各有所司無  
敢私凡出納雖絲毛事咸有文可覆諸婦惟事女  
紅不使豫家政內外極嚴輿臺通傳不敢越堂限  
家畜兩馬一出則一爲之不食人以為行義所感  
有家範二卷行于世入國朝白淵曰洧曰濂曰  
湜皆以行誼聞上召濂等入見問以治家長久  
之道對曰守家法而已上深嘉獎之拜湜爲福  
建叅議其家僮施慶居親喪哀泣不輟亦三年不  
御酒肉其薰染如此洪武祭酉尚書嚴震直述其

家世孝友以聞 上遣官簡拔其家子弟年三十  
以上者二十四人赴京選用曰濟最有文學除左  
春坊左庶子侍從 東宮丙子復選才閭右曰沂  
者召爲禮部尚書其從子榦拜御史楷蜀府教授  
辛巳夏四月旌表門閭曰漢者以宗長詣闕謝恩  
當陞辭曰

上御奉天門親書孝義家三大字題其傍曰賜浦江  
鄭漢而識以精一執中之璽百僚卿士咸爲詩文  
以頌之

臣節忠謹

高皇帝奉若天道刑亂國用重典洪武庚申正月左丞相胡惟庸與御史大夫陳寧等謀反既伏誅乃大治黨與遂罷中書省陞六部爲正二品分理政務而命群臣各舉所知五月甲午雷震謹身殿大赦九月丙午始置四輔官無太子賓客位列公侯都督之次秩正三品告于太廟必欲德合天人均調四時以臻至治以王本李祐龔敷爲春官杜敷趙民望吳源爲夏官惟秋冬官缺以本等攝之嘗諭本等沐浴致齋精勤國務逮立冬朔風驟寒以成冬令有勅獎之每賜坐講論治道且令圖其像

并賜 誥命及衣三襲又有待漏院記之賜既而  
本犯極刑召前御史中丞安然代之然憂懼而死  
於此見臣節忠謹之難也李祐安邑人龔敷貴溪  
人杜敷壺關人吳源莆田人安然潁州人又有何  
顯周內黃人多坐罪黜惟祐以老疾還鄉嘗主本  
省鄉試甲子丁卯庚午連三科皆無所避嫌云予  
按洪武二十年八月戊午遣國子監生鄧敏周彬  
以牲醴奠祭通政使榮河蔡瑄論文畧曰自昔君  
臣相遇非徒臣之得君者不易而君之得臣者尤  
難朕求多士以顯用之人各務私而不務公以致

亂政壞法者前後相蹈惟爾瑄起自儒生朕授喉  
舌之任命令出納少有乖謬隨即奏聞使有司肅  
然毋敢妄爲嬰疾弗瘳特命還鄉何期登途未遠  
即以訃聞今特遣奠并賜寶鈔二百五十貫仍免  
爾家差稅三年又洪武三十年七月甲戌遣行人  
童鍾諭祭故兵部尚書太子少保虹縣唐鐸其文  
畧曰嗚呼大丈夫生世五福且備者鮮聞其人爾  
之於朕始友及臣今四十年矣交不知變色絕不  
出惡聲幽德有餘芳名顯著高位厚祿優游太平  
年已七十考終于家可謂備膺五福古今之所罕

有人生若此死何憾焉始終保全若二人者不多見也惟鑷工杜安道起自尚冠郎終太常卿厨子徐興祖起自典膳丞終光祿卿侍

上起兵吳越畧淮楚攻齊魯汴蔡以至統一天下三十餘年出入內廷慎密不泄遇要官勢人如不相識一揖之外不啓口而退故

上每稱忠謹必以二人爲言噫搢紳之徒無亦愧哉  
詠初月

父老相傳懿文皇太子生皇孫建文頂顱頗偏高廟撫之曰半邊月兒知必不終及讀書甚聰穎

夕懿文與之侍側 上命詠初月 懿文詩曰昨夜  
嚴陵失釣鉤 何人推上碧雲頭 雖然未得團圓相  
也有清光照九州 皇孫詩曰誰將玉指甲 搯作天  
上痕影落江湖 裏蛟龍不敢吞 上覽之默然 蓋  
知懿文必早世 而皇孫將免難也 乃授鑰匣戒以  
臨難乃啓 比得披荆之具 及楊應能度牒 出走無  
知者 正統庚申春 恩土官知州岑瑛 奏送還京

姓名相同

庚辰廷試 王良當魁貌不及胡廣 且廣策斥親藩  
上遂擢廣第一 賜名靖 後復舊名 與楊東里善 約致

仕後拿舟往來及廣死楊夢與廣對酒聯句恍然  
風約也詩有金螺瀟洒對芙蓉豎渚漁洲窈窕通  
之句廣病篤時人投詩假楊作云漢朝胡廣號中  
庸今日中庸又見公堪笑古今兩奸究天教名姓  
正相同得詩慙憤數日卒按宋陳賈劾朱子人謂  
之云姬周大聖猶遭謗伊洛名賢亦被譏堪笑古  
今兩陳賈如何專把聖賢非詩蓋祖此廣在內閣  
歌頌祥瑞以啓佛老大興揚實從通之

綱常爲治

至正甲辰天竺中印度僧板的達至燕元主受灌

頂淨戒洪武甲寅至金陵召見稱旨賜銀印號善  
世禪師統制天下諸山仍移文各郡許詣蔣山受  
菩薩戒法所司勿禁人多繪像事之以爲活佛

御製善世歌有笑談般若生紅蓮之句尋遊方三年  
復還蔣山依止八功德水賜金環齒衣 車駕臨  
幸必造其室咨問法要屢賦詩有曰晨坐巖前觀  
日出暮禪松底聽風來蓋覩之也辛酉五月患足  
疾死了無他異葬天禧寺右塔而室之富平丘玄  
清者年十二因病出家爲道士洪武辛酉遇張三  
丰于武當山居五龍雷應宮有薦其材者

上召與語大悅拜監察御史賜之室辭不受明年春  
超擢太常卿贈其祖茂都轉運鹽使司同知父濟  
川布政使司右叅政毋張氏贈淑人每大祀天地  
上宿齋宮詔以雨暘之應玄清奏對稱 旨益敬焉  
一夕謂門徒曰我棄世去矣瞑目而逝年六十七  
亦無他異二人者終非仙佛徒叨冒一時光寵耳  
於是 上著論有曰聖賢善守一定不易之道而  
能身行之以化天下愚頑其道云何三綱五常是  
也大哉 皇言與孟子經正民興之旨符矣故我  
國家以綱常爲治終不惑於異端者 寔本諸此

御寶文移

南京禮部有 御寶文移庚辰十二月初十日

勅諭朕聞有天下者之有寶所以昭大信示傳承也  
然中古傳記莫考自漢以來始因傳國璽演而為  
六唐宋又益以鎮國定命受命諸名厥數愈繁矣  
我 朝國初嘗備用之後復中正朕承序之初因  
得貞玉協于異夢受命之符遂考古典乃造為大  
寶以天命明德表正萬方精一執中宇宙永昌為  
文定名曰凝命神寶惟以鎮國寶藏因而備造六  
寶以復近古之制并皇帝奉天恭禋制誥勅命四

寶及精一執中御府丹符二圖記凡十有三皇帝  
之寶詔赦用之皇帝行寶命將出師用之皇帝信  
寶徵兵用之天子之寶詔四夷用之天子行寶賜  
四夷物用之天子信寶徵兵四夷用之奉天之寶  
郊禋用之恭禋之寶封印香合用之制誥之寶制  
諭誥文用之勅命之寶勅諭勅文用之精一執中  
手書用之御府丹符封記符號用之所以備一代  
之制傳子孫于永久也爾禮部其宣教天下使明  
知之此史之闕文也

雙槐歲抄卷第二

雙槐歲抄卷第三

三丰遯老

璫枝玉樹屬仙家未識人間有此花清致不沾凡  
雨露高標猶帶古烟霞歷年既久何曾老舉世無  
雙莫漫誇便欲載回天上去擬從博望借靈樁此  
三丰遯老張玄玄詩也玄玄名全一或曰通一三  
丰其號也世呼爲張邈邈或謂寶雞人或謂遼東  
人手姿魁偉龜形鶴骨大耳圓目鬚髯如戟頂作  
一髻手中執方尺無寒暑惟衣一衲或處窮寂或  
遊市井浩浩自如傍若無人有問之者終日不答



一語及與論三教經書則吐辭衮衮皆本道德忠  
孝每事來輒先知之三五日或兩三月始一食然  
登山其行如飛或隆冬卧雪中齟齬如常時人皆  
異之洪武初入武當登天柱峯徧歷名勝使其弟  
子丘玄清住五龍廬秋雲住南巖劉古泉楊善登  
住紫霄乃自結草廬於展旗峯北曰遇真宮立草  
菴於黃土城曰會仙館令弟子周真得守之洪武

庚午拂袖長往不知所在明年

高皇帝遣三山道士請玄玄造

朝了不可覓或謂

在青州雲門山洞窟中永樂初

文皇帝累遣使求之以給事中胡公淡徃徧物色之

不能得十年二月十日致書曰

皇帝敬奉書真仙張三丰先生足下朕久仰真仙渴  
思親承儀範嘗遣使致香奉書徧詣名山虔請真  
仙道德崇高超乎萬有體合自然神妙莫測朕才  
質踈庸德行菲薄而至誠願見之心夙夜不忘敬  
再遣使謹致香奉書虔請拱竢雲車夙駕惠然降  
臨以副朕拳拳仰慕之懷三月六日

詔道士虛玄子孫碧雲者徃武當於玄玄舊遊處建  
道場異有聞焉

御製詩賜之曰太華山高九千仞幽人學道巢其巔  
雲邊一卧知幾年懸崖鐵鎖常攀緣世間萬物無  
所累飢食瓊芝渴乳泉鍊就還丹握化權三關透  
徹玄中玄高奔日月呼紫烟絳宮瑤闕長周旋五  
華靈牙植丹田明珠一點方寸圓左挹神公右白  
元夜開明堂相與言窈冥恍惚合自然飄飄直上  
大羅天時人欲見不可得三峯下俯飛鴻翼丹丘  
羽人常往還紅崖亦松舊相識只今邂逅契心期  
青瞳綠髮烟霞姿洞天福地游欲徧道遙上下懸  
虬螭若遇真仙張有道爲言竚埃長相思詩意

拳拳於三丰也碧雲亦受命於武當之南巖修煉以冀見之

聖孝瑞應

文皇帝在藩聞烏思藏有尚師哈立麻者異僧也求樂初遣中官侯顯齎書幣往迎五歷寒暑丙戌十二月乃至車駕躬往視之無拜跪禮合掌而已上宴之華蓋殿賜金百兩銀千兩綵幣法器不可勝紀尋賜儀仗與郡王同封為萬行具足十分最勝圓覺妙智慧善普應佐國演教如來大寶法王西天大善自在佛領天下釋教賜印誥及金銀紗

綵幣織金珠袈裟金銀器皿鞍馬其徒封拜有差  
五年春二月庚寅命於靈谷寺啓建法壇以薦

皇考皇妣尚師率天下僧伽舉揚普度太齋科十有  
四日上伸誠孝下及幽爽自歲事之始至於竣事  
卿雲天花甘雨甘露舍利祥光青鸞白鶴連日畢  
集一夕檜栢生金色花徧于都城金仙羅漢變現  
雲表白象青獅莊嚴妙相天燈導引旛蓋旋繞亦  
既來下文聞梵唄空樂自天而降群臣上表稱賀

學士胡廣等獻

聖孝瑞應歌頌自是

上潛心釋典作爲佛曲使宮中歌舞之永樂十七年  
御製佛曲成併刊佛經以傳九月十二日欽頒佛經  
至大報恩寺當日夜本寺塔現舍利光如寶珠十  
三日現五色毫光慶雲奉日千佛觀音菩薩羅漢  
妙相畢集續頒佛經佛曲至淮安給散又現五色  
圓光綵雲滿天雲中現菩薩羅漢天花寶塔龍鳳  
御象文有紅鳥白鶴盤旋飛繞禮部行翰林院撰  
表徃北京稱賀

上甚嘉悅明年五月十六日命禮部尚書呂震右副  
都御史王彰齋奉諸佛世尊如來菩薩尊者名稱

歌曲往陝西河南頒給神明協應屢現慶雲圓光  
寶塔之祥在京文武衙門上表慶賀

上益嘉悅知皇心之與佛孚也中官因是益重佛禮  
僧建立梵刹以祈福者徧南京城內外云

劉伯川善觀人

秦和劉伯川平生輕財如糞土中年尚有田數十  
畝一日悉散予其親戚閭里又散遣臧獲獨與其  
妻處敝廬數椽僅蔽風雨而旦暮饘粥休休如也  
平居不與俗人接然善觀人時楊士奇年十四五  
與陳孟縈往候之伯川以二人皆故人子入見款

洽焉是日雪霽酒酣伯川命各賦詩言志孟縈賦  
云十年勤苦事鷄窓有志青雲白玉堂會待春風  
楊柳陌紅樓爭看綠衣郎士奇即景賦云飛雪初  
停酒未消溪山深處踏瓊瑤不嫌寒氣侵人骨貪  
看梅花過野橋伯川顧孟縈笑曰十年勤苦只博  
紅樓一看邪子當不失風流進士顧士奇笑曰雖  
寒士當耐又曰人有不爲也而後可以有爲子當  
大用尚勉之惜予不及見也伯川卒後孟縈果登  
第爲翰林庶吉士而士奇官至少師皆如伯川言

胡貞女

修和局年  
卷三  
三  
永樂初學士解縉胡廣侍燕文淵閣

太宗皇帝曰縉廣少同業仕同官今縉已有子廣宜妻之以女廣俯首曰臣妻有娠未卜男女

上曰定生女勿疑矣越數月而貞女果生因名吉慶奴以 上所料也遂訂盟縉子禎亮未幾解氏遭高煦誣譖舉家戍遼欲使貞女改適女竊入室以刀截耳家人覺而救之血被兩頰且言曰薄命之婚

皇上主之父面承之一與之盟終身不改况背主違父何用生為越數年洪熙改元特有解氏禎亮歸

娶女既歸解氏事二姑極孝事夫惟謹姑徐氏多病不離牀席十餘年雖浣滌穢污皆親爲之且知書史性柔愍側室子女視如己出卒年八十五廣有此貞女然建文擢爲狀元乃棄之若弁髦何也無亦愧其女邪

史孝子

史五常內黃人父萱洪武間任廣東按察司僉事卒于官五常始七歲母以幼且無資不能歸葬遂權厝之遂携五常北返每諭之曰汝父棺中有大錢可驗待汝長成時尋骨歸葬則汝可報父恩而

我亦盡婦道矣後母沒五常年五十乃往至殯所  
求焉既至弗獲旦夕泣告于天路人憐之遺以飲  
食數日憲幕張珪知之爲白於臺馳簡巡司李斌  
多方物色果得所殯遺骸大錢猶在五常以禮斂  
襯當道重其孝給以舟車路費贈以詩文既返葬  
結廬墓側居三年正統間有司列狀上聞詔旌表  
其門左布政錦川梅應奎贈詩云河北史孝子萬  
里來廣州暮投和光寺慘淡如羈囚相見不肯言  
哽咽涕泗流侵晨趨相府長跪述所由兇昔方七  
歲嚴親此宦遊三年佐風憲長貳資良箠嚴親忽

亡逝母氏深懷憂陸行乏輿馬水宿畏蛟虬昇棺  
寸步難何以歸故丘禪關有隙地乞土寄一坏母  
子孤且粥粥促歸舟還鄉理先業薄有舊田疇  
兒年日已壯痛父骨未收忍離母膝下望臨倚門  
愁向來護花墮喪葬事已休卽爲嶺表行不與妻  
子謀路苦焉足恤到來述所求門巷非舊日顧瞻  
林木稠重泉深且閔躑躅空夷猶上官幸垂憫庶  
得志願酬言訖卽搗泣感動仁公侯霜簡發嚴令  
通衢廣尋誣父老四五人指示東牆幽發榻見青  
錢棺底昔所投黃金與白壁次第歸衾稠孝子悲

且喜勝獲千琳璆稽首謝蒼天伏地禮比丘拜辭  
烏府舊金帛仍相周山川耿南北何暇畏阻修親  
寬既安妥祖隴茂松楸孝子亦年老華髮風颼颼  
誠心格穹壤孝行徧遐陬我作短歌行送別南海  
頭瘡癘不爾毒盜賊不爾仇安行至鄉里嗟哉誰  
與儔願爾增壽考在世百春秋願爾賢子孫世業  
治箕裘以求敦薄俗芳名千載留今按廣州志和  
光寺在南海西南街鄉人以祀六祖者洪武二十  
四年歸併光孝寺梅應奎作應魁云

冷協律

冷協律起敬謙隱居杭州吳山頂上曉音律善鼓  
琴飄飄然有塵外之趣 國初授太常司協律郎  
洪武元年五月 詔校正音樂太常少卿陳昧翰  
林學士詹同待制王禕與起敬及儒士熊太古等  
定郊廟諸樂章起敬裁定爲多劉伯溫基集云舊  
在杭時爲起敬賦泉石歌亂後失之今起敬爲協  
律郎邀予寫舊作已忘而記其起三句更足成之  
其歌曰君不見吳山削成三百尺上有流泉發蒼  
石冷卿以之調七絃龍吟太陰風動天初聞涓涓  
響林莽悄若玄宵鬼神語玲然穿岬達幽谷竿籟

颼颼振喬木永懷帝子來瀟湘瑤環瓊珮千鳴璫  
女夷鼓歌交甫舞月上九疑啼鳳凰還思媧皇補  
穹碧排扶銀河通積石咸池瀉浪入重溟玉井水  
澌相戛擊三門既鑿龍池高三十六鱗騰夜濤豐  
隆咆哮震威怒鯨魚捷尾驚蒲牢倏然神怪歸寂  
寞殷殷餘音在寥廓鮫人淵客起相顧江白山青  
烟漠漠伯牙骨朽今幾年叔夜廣陵無續絃絕倫  
之藝不常有得心應手非人傳憶昔識子時西州  
正繁華箏笛沸晨莫兜離漫矜誇子獨徜徉泉石  
裏長日松陰淨書几取琴爲我彈一曲似鞠滄浪

洗塵耳否往泰 水逢

聖明有虞製作起莖英和聲協律子能事罔俾夔摯  
專其名自伯溫語意觀之既素與起敬舊相識則  
其人必有居址杭志以爲錢唐人理或然也世傳  
起敬有仙術有告以貧乏者畫壁爲門門有鶴使  
細觀之則門啓而入得金寶以歸而遺其引蓋

朝廷內帑也守者得引以告逮其人至遂株及起敬  
起敬既至京師隱身入板壁中逮之者鑿壁以獻  
猶應對作聲既而莫知所在又傳所繪蓬萊仙奕  
圖末樂壬辰孟春三日三丰遯老跋以遺太師淇

國公丘福者謂冷君武陵人名啓敬龍陽子其號也然洪武中三丰既遜去求樂初

文皇帝遣使求之不獲丘淇國乃靖難功臣日侍左右豈敢隱匿不告豈神仙踪跡固不可測歟壬辰乃求樂十年即旁求致書之時也豈流傳訛舛而然歟漫識之

姚少師

姚廣孝蘇之長洲人元壬辰披剃爲僧名道衍洪武癸丑請給禮部度牒於覺林寺入冊刻意爲詩文由是知名詠百花洲云水艷接橫塘花多礙舟

路波紅晴漾日沙白寒栖鷺綠汀漁網集隔浦菱  
歌度不見昔遊人風烟自朝暮京口覽古云譙樓  
年來戰血乾烟花猶自半凋殘五州山近朝雲亂  
萬歲樓空夜月寒江水無潮通鐵甕野田有路到  
金壇蕭梁事業今何在北固青青客倦看味其詞  
旨識者知其非縉流也壬戌九月 詔選高僧分  
侍諸王衍徃燕府住持慶壽禪寺遂預靖難之功  
壬午十月拜僧錄司左善世永樂甲申三月簡東  
宮輔導擢太子少師復其姓名賜 勅諭曰卿秉  
性篤實學行老成事朕藩邸積有年歲朕靖難之

初卿侍左右謀謨弼贊裨益良多今建儲嗣簡求  
賢輔以卿舊人特授太子少師夫太子天下之本  
也必賴啓迪匡正輔成德器卿尚勉盡厥職副朕  
眷倚之重欽哉自善世遽長宮寮亦異數也後

太孫初出就學命設講席於華蓋殿之東復令廣孝  
及翰林內閣之臣侍焉九年考滿爲壬辰二月吏  
部尚書兼詹事蹇義兵部尚書兼詹事金忠於武  
英殿奉 旨給與誥命封贈於是祖菊山父妙心  
俱贈資善大夫祖母周氏母費氏俱贈夫人併本  
身凡五道蓋不畜髮娶妻故也蘇人云廣孝既貴

後嘗奉 命賑濟還吳吳有隱士王光庵先生者  
與之有舊往詣之先生閉門不納凡三往乃獲見  
先生無他言但連聲曰和尚誤矣又往見其姊姊  
亦拒之曰貴人何用至貧家為乃僧服而往始納  
之一拜後姊不復出戊戌三月廣孝病篤

上駕幸其第問後事對曰出家人復何所戀強之乃  
曰僧洽南洲在獄久矣 上即日出之卒年八十  
四贈榮國公謚恭靖

長陵八駿

太宗八駿圖其一曰龍駒戰于鄭村塢乘之中箭都

指揮丑丑拔其二曰赤兔戰于白溝河乘之中箭  
都指揮亞失鐵木兒拔其三曰烏兔戰于東昌乘  
之中箭都督童信拔其四曰飛兔戰于夾河乘之  
中箭都指揮猶兒拔其五曰飛黃戰于藁城乘之  
中箭都督麻子帖木兒拔其六曰銀褐戰于宿州  
乘之中箭都督亦賴冷蠻拔其七曰棗騮戰于小  
河乘之中箭安順侯脫火赤拔其八曰黃馬戰于  
靈壁乘之中箭指揮雞兒拔學士劉定之詠焉蓋  
靖難時胡騎官軍最近左右故也按八駿始於穆  
滿後千餘年復見於唐太宗我長陵馳驅西北

濟世安民適相符合如此

柳庄相術

袁廷玉名珙以字行其先南昌人也五世祖子誠  
宋知臨安府始家鄞焉廷玉幼喜觀書壯益爽秀  
嘗游東海晉怛洛伽山僧有別古峩者善相見而  
悅之謂其眼光如雷法當以術顯因給令仰視赤  
日待兩目盡眩潛布黑赤豆於暗處使辨之又夜  
縣五綵絨線線牕紙外使映月光別其色所試皆中  
然後授其術且曰子後當出我右慎勿妄洩也其  
法候夜將二鼓或五鼓罷燃兩炬坐對求相者數

以其炬左右視形狀氣色叅以所生年月而吉凶  
之徵有若符契浦江戴九靈良為作傳備言其應  
驗之詳建文聞其名初位東宮即召見使相焉廷  
玉言害氣在西北方人當豫防之洪武丁丑燕府  
遣儀衛司正蔡禮齋幣徵聘戊寅三月至北平

太宗召見廷玉稽首言曰異日太平天子也龍形鳳  
姿天廣地闊額如圓璧伏犀貫頂日麗中天五岳  
附地重瞳龍鬚五事分明二肘若肉印狀龍行虎  
步聲如撞鐘足底龜文有雙黑痣年交四十鬚過  
於臍即登寶位館于仰山寺僧道衍室宴賚無筭

謀必預焉已卯遣歸七月至淮安而靖難起事矣  
至家為民人周繼祖訐告按察僉事唐泰械赴京  
師 詔宥之惟令太醫院使戴原禮取相書以進  
壬午六月

太宗登極命千戶張勇典膳徐福馳驛召之既至拜  
太常寺丞其子忠徹克傳其術官至尚寶司少卿  
家本旗手衛軍 詔開除之庚寅十二月卒 賜  
葬祭有旨令姚廣孝誌其墓云

### 金尚書際遇

洪武中袁廷玉以事過鄞縣前見婦人乳女于榜

廊下哭聲淒其問其故對曰夫當戍趙州今在酒肆飲旗軍飲畢即行矣言既哭益悲衷心憐之往見其夫夫曰我韓嶺金世忠也居以卜課度日今缺戍為族人賂旗軍以我代行表相其面曰此尚書骨法也他日當大貴此行勿憂因代償其酒價又貸米二斗贖之臨行囑曰登舟即順境他日富貴無相忘既而舟泊西渡共濟者病腹痛金與之卜言宜用衣帶刮咽喉下即愈其人如其言果瘥驚以為神因厚謝之沿途惟用謝卜所得因不置乏至戍所開卜肆以奇驗聞 燕邸召至問以靖

難卜告以吉援引古今才識溢發

上大喜多用其謀策因薦袁

上文召之後師起以世忠署長史累遷至兵部尚書  
兼詹事即金忠也洪熙初追贈少師謚忠襄子達  
方十歲授檢討還鄉支俸幼童廕官寔自此始其  
際遇亦奇極矣

甲申庶吉士

永樂甲申會試取楊相等四百七十二人遵乙丑  
例也殿試首甲曾祭周述周孟簡三策皆有御  
批二甲前數名俱刊策而附讀卷官姓名批語於

後選庶吉士入翰林則刊策者皆在且分二等作文者楊相王訓王直吾紳劉子欽彭汝器章朴熊直王道盧翰柴廣敬余學夔洪順段民沈升羅汝敬宋子瓌周忱秦政學徐安周文李寧張徹歐陽俊梁任曹景輝陸孟良蕭省身劉孟鐸張宗璉田忠曾與賢洪鍾陳滿蕭清劉紹林鳳張憲殷昂嚴光祖涂順孫子良李昌祺涂敬蕭寬褚讓獨孤樂善陳士啓曾慎魏騏吳惇習字者王英湯流余鼎孫奉李永年皆支從七品俸以二甲進士也作文者章敞倪維哲李時勉陳敬宗袁添祿楊勉李貞

江鐵許瑤王仲壽李迥楊燦李衡陳綱董鏞劉子  
敬陳伯恭陳資善趙曾劉剛龍儀趙濟劉澄黃陽  
趙理添齊韓庸史彬趙琰徐觀樊靜曹彥昌田堉  
王宅葉貞陳興俞禮趙濬恭潘中徐聆胡秉彝周  
志義俞益曹睦陽儀鳳譚原性陳旭羅處富邢旭  
曾恕習字者袁邇周遠鍾旭彭禮戴弘演皆支正  
八品俸以三甲進士也凡百有十一人選首甲三  
人二甲楊相至羅汝敬王英至余鼎三甲章敞至  
楊勉凡二十八人以應二十八宿進學文淵閣而  
周忱自陳亦與焉餘八十五人惟於本院待選而

已每月奉 旨賜讀書秀才曾祭等燈油諸費而  
忱不與次科丙戌首甲林環等三人及三月二十  
日覆考舉人周翰藍勗 賜冠帶支教諭俸俱與  
曾祭等同讀書月賜亦如之而文翰優等庶吉士  
朱璿等十三人不與其後進學內府者凡六年惟  
王直王英余學夔余鼎羅汝敬彭汝器授修撰餘  
多爲刑部主事至戊戌六月侍讀李時勉侍講陳  
敬宗皆以刑部主事改而周藍二舉人僅三年得  
授典籍蓋史館清華官不輒授如此

洪恩靈濟宮

永樂丁酉二月建洪恩靈濟宮于北京皇城之西  
祀徐知證及其弟知諤初其父温事吳楊行密及  
温養子知誥代楊氏有國復姓李改名昇是為南  
唐封知證為江王知諤為饒王嘗帥兵靖盜閩人  
德之立生祠于閩之鰲峯累著靈應然温公通鑑  
書知諤為南唐鎮海節度使無中書令梁王卒謚  
曰懷而知證無可攷蓋皆沒而為神者也宋高宗  
賜祠額曰靈濟入國朝靈應尤著有道士曾辰  
孫者扶鸞則二神降之

文皇帝遣人禱祠輒應間有疾問神神降鸞書藥味

如其法服之每奏奇效辰孫大被 寵賚因請建  
宮加額於是封知證為九天金闕明道達德大仙  
護國庇民洪恩真君知諤為九天王闕宣化扶教  
上仙輔國佑民洪恩真君江饒 王爵女故仍命禮  
部新鰲峯之廟春秋致祭給灑掃五戶

御製碑文系以詩有曰天產英靈為世傑出入幽明  
猶一覘生著動勞保甌粵沒為明神崇偉烈亦不  
稱其為仙真也嘗遣禮部尚書往鰲峯易其真衣  
謂之掛袍頗大勞費後乃改遣太常寺官焉

宮建祥異

文廟初嗣大統卽詔以北平為北京每巡幸稱行

在設行部官開科曰北京行部鄉試末樂四年七

月文武群臣淇國公丘福等請建北京宮殿以備

巡幸從之於是命官採辦大木十四年十一月以

營建重事乃命群臣會議皆以為宜十五年十一

月癸丑建立奉天殿乾清宮己未督工泰寧侯

陳珪等奏二處俱現五色瑞光瑞雲瑞靄縕流

動爛徹霄漢庚申金水河冰凝異瑞體具諸像至

巳巳卿雲呈彩五色輪囷變化卷舒彌滿殿問卿

雲內又出五色瑞光團圓如日正當御座巳而西

度宮苑映

上今所御殿廷終日不收官軍人匠

群目共睹禮部於是行翰林院撰表壬申群臣稱

賀十九年正月

郊社宗廟

宮殿告成乃置曹司

一依金陵舊制仍稱行在是年四月庚子

奉天三殿災

上承

天心仁愛兢懼靡寧於是大赦天下

詔求

直言

勅尚書蹇義等偕給事中二十六人巡行

天下安撫軍民而言事給事中柯暹御史何忠鄭

惟桓羅通皆陞知州主事蕭儀言尤峻直

上曰方建都時朕於大臣會議非輕舉也幸賴夏原

吉匡棟反災為祥求孚于休夫豈無自哉正統辛酉始定為京師革行在之稱云

觀燈應制

永樂己丑令自正月十一日為始賜元宵節假十日壬辰正月賜文武群臣宴聽臣民赴午門外觀鰲山歲以為常戶部尚書夏原吉侍母往觀

上聞遣中官賫鈔二百錠即其家賜之曰為賢母懽也自是車駕駐兩京皆賜觀燈宴

上或御午門示御製使儒臣奉和覽而說之賜以羊酒鈔幣時評應制諸作以陳侍講敬宗五首為

工其一皓月金門夜和風王殿春雲移三島近燈  
簇萬花新天仗臨丹宸星橋接紫宸中官宣德意  
燕賞及詞臣其二紫禁踈鐘靜高城刻漏傳五雲  
迎寶蓋萬炬綴金蓮瓊醴行仙席龍盤進御筵教  
坊呈百戲齊過玉階前其三劔珮青霄近峯巒翠  
閣重花明金幄月香度玉樓風拜舞諸番集歡娛  
萬國同遙聞歌吹發五色慶雲中其四紫陌連青  
禁彤樓接絳河九門星彩動萬井月華多寶炬通  
宵朗鸞笙叶氣和臣民涵聖澤齊作太平歌其五  
山擁金鰲壯雲盤彩鳳來銀河隨斗轉珠闕倚天

開歡洽春聲徧恩從淑氣回願歌魚藻詠長奉萬  
年杯

駕馭文武

國家所以駕馭文武者惟擢用與承襲而已文則藩  
臬武則衛所內外弛張使 恩威莫測惟

文廟爲然永樂初擢前工部右侍郎張顯宗爲交趾  
左布政使右通政兼中允儀智爲湖廣右布政使  
十年十二月擢進士周文褒爲河南左布政使黃  
澤爲左叅政陳祚爲右叅議監生梁通爲河南按  
察使進士楊政監生劉智爲副使十一年四月陞

兵部右侍郎徐銘爲山西左布政使戶部右侍郎  
張春爲右布政使鴻臚寺右少卿王玘爲山西按  
察使十八年閏正月人材十三人擢左布政使四  
人馬麟湖廣盛頤江西俞景周山東周克毅廣西  
右布政三人孫豫山西江潤河南艾瑛浙江左叅  
政二人陸勉四川吳衡陝西右叅政二人楊敬福  
建李泰庶叅右叅議二人趙瑛江西金恕山西皆  
以布衣而躋方面極品尤異事也相傳

文皇夜夢十三人共扶一殿柱文一馬徧身生鱗明  
日引見數合而麟居首故有是命七年二月御史

林道許信于賢以在任平常送秦寧侯處爲辦事  
官至十九年正月二十一日陽武侯薛祿於

奉天門口奏三人辦事勤謹今十二年矣奉

旨送吏部還職文有發充交趾爲吏如給事中羅亨  
信者或充驛夫者後皆復官不能盡記也武官子  
弟襲職洪武故事初比試不中許襲職支半俸逾  
二年復試支全俸不中仍減半又二年亦如之三  
試不中發充軍子患殘疾不能承襲者月支俸三  
石十年內有子仍襲祖職十年外不准襲令爲民  
求樂中命一試不中戍開平再試不中戍交趾三

試不中成烟瘴之地以警勵之行五年而復舊例  
其以奉天征討得功者謂之新官子弟年十六承  
襲且免比試子患殘疾者給全俸終身十年後有  
子俱准承襲視舊官優厚甚矣

臨泣本貫

永樂甲申七月改陝西右布政使杜智為左而以  
刑科都給事中西安楊恭代之入謝以本貫辭弗  
許尋選一能者往察之問禮部尚書呂震震舉主  
客郎中吳江平思忠遂擢叅政思忠起家縣吏精  
敏機譎其養子安私以紗羅度潼關為抱關者所

發時思忠他出恭命收而勿籍待其歸付焉思忠  
感愧不復敢言其短久之恭竟坐罪謫陝西行都  
司辦事官辛卯十二月上念恭洪武中近臣被  
黜於建文時特宥之復其原職又許廓者家開封  
之襄城貢入太學畧管工部左侍郎奉勅巡撫河  
南時流民甚衆亟奏蠲積年逋賦減免丁夫禁豪  
右逼索私負於是民漸復業還

朝陞兵部尚書降勅獎之樊敬字守一兗州鄆城  
人丁丑再試進士未樂中爲左通政鎮守濟寧以  
行軍司馬行事陞刑部左侍郎三人者皆臨涖本

貫亦異事也

周憲使

吾廣南郭外有高第里周憲使新家焉初名志新  
已卯鄉舉入太學筮仕大理評事改御史受知於  
文皇帝嘗呼爲周新因以志新爲字彈劾不辟權要  
人呼爲冷面寒鐵永樂元年巡按福建奏言朝  
廷設立軍民諸司彼此頡頏兩非統屬今都司所  
轄各衛每府官過門或遇諸途輒怒府官不下馬  
甚至鞭辱僕隸衛所公務徑行有司理辦稍不從  
即呵責吏典請自今府衛相見行平禮遇諸途則

分道而行所有公務不許徑行府縣有司官吏  
得凌辱遇 聖節正旦冬至在外衛官悉於府治  
行禮開讀 詔書雖邊海衛所亦從布政司差人  
都司毋與 上悉從之二年巡按北京時制令所  
屬吏民有犯徒流者免罪就發北京民稀處種田  
監候詳擬徃復數月多死獄中新奏請今後死罪  
及職官有犯詳擬待報其吏民犯徒流者悉從北  
京行部或巡按詳允就發種田如此則下無淹滯  
之患上不負寬恤之恩矣 上諭都察院官曰御  
史言是也且命北京百姓有犯應決者許收贖燕

民大悅三年九月陞雲南按察使境中有虎害爲  
文告城隍渎吏得虎格殺之初來時道上蠅蚋迎  
馬而聚尾之見一暴尸惟小木私記在收之及履  
任令人市布得相同者鞠之即劫布賊也悉以其  
賊召給布商家家人大驚始知其死於賊也六年  
三月改浙江有寃民淹繫聞之喜曰冷面寒鐵公  
來吾無患矣及至洗其寃放之一日視篆忽旋風  
吹異葉至前左右言城中無此木獨一僧寺有之  
去城差遠新悟曰此必寺僧殺人埋其下也寃魂  
告我矣發之得婦人屍僧即歎服人稱爲神明一

巨商遠回未抵家

吳恐爲人所圖潛以其贖埋

一祠石下至家妻之告以故明日掘之無有也  
往訴之新新曰是必而妻有外遇也覈之果然蓋  
歸語妻時摟之者竊聽先往取之矣遂併治之會  
夏秋霖潦窪田盡沒永樂九年湖州府無徵糧米  
十七萬二千四百餘石所司一槩催徵民日逃亡  
奏乞遣官覆驗上即命戶部覈實蠲免時錦衣  
衛指揮紀綱使千戶往浙緝事犯賊新捕治之千  
戶脫走訴於綱綱奏新專擅時方進湏知至涿州  
上命官校逮新既至抗聲陳其罪且曰按察司行事

與在內都察院同 陛下所詔也臣奉詔擒奸惡  
耳 上怒命僂之臨刑大呼曰生爲直臣死當作  
直鬼 上尋悟其寃顧侍臣曰新何許人對曰廣  
東歎曰廣東有此好人稱枉者再後紀綱坐罪伏  
誅其事益白同里彭叅政森作傳謂 上嘗見有  
衣紅立日中者問爲誰曰臣周新也上帝以臣剛  
直命爲城隍言已不見 天頗憮然楊都憲信民  
巡撫時其夫人猶在貧居如洗每賙以俸給語人  
曰周志新當代第一人吾黨所不及也

龍馬

永樂庚子十二月青州府諸城縣民崔友諒家有  
牝馬常浴于清水潭雲霧興騰若有物與交及生  
駒色青蒼而麟臆肉爰龍文徧體形狀非常有司  
進于 廷文武百官表 賀以爲龍馬按宋學士  
集洪武四年六月僞夏明昇降獻良馬十其一白  
者產自貴州養龍坑與此相類蓋乾象飛龍坤象  
牝馬陰陽配合繫理之常者耳

玉簫宮詞

懼仙宮詞曰忽聞天外玉簫聲花底徐行獨自聽  
三十六宮秋一色不知何處月偏明王司綵宮詞

曰瓊花移入大明宮旖旎濃香韻晚風贏得君王  
留步輦玉簫遼亮月明中是時賢妃權氏順妃任  
氏昭儀李氏婕妤呂氏美人崔氏皆朝鮮人權尤  
穠粹善吹玉簫永樂八年侍上征虜還至臨城  
薨謚恭獻朝鮮國王李芳遠驛送妃父權永均至  
拜光祿寺卿食祿不管事尋遣歸國貢女不復至  
聖德剛明不為蠱惑如此

首甲硃書

永樂甲辰進士邢寬第一梁裡第二孫曰恭第三  
首甲姓名皆硃書前此所未有也先是讀卷官奏

以曰恭為狀元 上以其名類暴而易以寬相傳  
文廟謂曰為日楊士奇以曰對問何以知之曰臣聞  
名子者不以日月不以山川以是知之榜出人  
以硃書之異喧謂三人者必大用也然禋終編修曰  
恭終侍讀景泰壬申寬以侍講起復適南京掌院  
自缺吏部推寬 命以本職往泣 內閣奏言寬  
學行老成使以屬官從公卿後事體未便乃得陞  
侍讀學士甲科至是將三十年矣竟終于五品

古註疏

經書註疏語仁者靜孔安國曰無欲故靜周子取

之易利貞者性情王弼曰不性其情何能久行其  
正程子取之予謂一人之心天地之心也一日之  
動一歲之運也喜樂哀樂未發之前聲色臭味未  
感之際所謂人生而靜天之性也太極渾淪之體  
也及感物而動則性蕩而情矣群動既息夜氣清  
明然後情復于性與秋冬歸根復命之時亦奚異  
哉故君子自修亦不遠復而已予于註疏二言深  
有取焉自求樂中纂修大全出談名理者惟讀宋  
儒之書古註疏自是廢矣

通撰九六

易變易也陰陽不測謂之神神无方而易无體故七八不變則有方體也九六變則无方用也乾言用九坤言用六以為諸卦占例晉韓氏康伯註乾之策二百一十有六曰乾一爻三十有六策取其過揲四分而九也坤之策一百四十有四曰坤一爻二十有四策取其過揲四分而六也是則二十有八策為七三十有二策為八其不用可知宋沈括始以過揲之餘三少為乾老陽兩多一少則少者主之為震坎艮少陽三多為坤老陰兩少一多則多者主之為巽離兌少陰朱子本義與筮儀微

有同異故易學啓蒙列圖明之皆徇括說也然韓氏易簡得繫辭之旨矣

解氏兄弟

士君子敬慎其身貨利逸遊不可以不戒吉水解綸解縉者從兄弟也洪武戊辰同登進士綸為禮部主事始以多占官房賃與客商買賣取瓦錢鈔犯該克軍 上宥之矣已而私出門禁收買羨米疑忌 朝廷不帶家小緊宥還職尋改應天府學教授乃因庫子糶米嚇取鈔貫索膳夫買辦什物為生員訐告二十七年坐罪誅死縉文學書札高

出一時爲中書科庶吉士授御史坐輕脫謫河州  
吏建文召爲文淵閣待詔永樂初爲學士更名薦  
已而復舊其輕脫猶故也在內閣坐廷試讀卷不  
公出爲廣西布政司叅議尋有言其漏洩建儲時  
密議者遂改交趾時檢討王侁亦以罪謫二人遂  
共趨廣東娛嬉山水奏請鑿贛江以便往來

上怒徵縉併侁下獄俱死獄中嗚呼兄弟同登甲科  
世所竒也然一死於貨利一死於逸遊可不戒哉

觀物吟

客有手一鉅編贈予者乃錄本觀物吟也作者爲

道士鄧青陽羽自言居武林時忘情消白日高卧  
看青山動落花流水之機適聞雲幽鳥之趣遂成  
意外不期然而然之句初無意於詩也予愛其一  
絕云人生天地長如客何獨鄉關定是家爭似區  
區隨所寓年年處處看梅花其中所存可槩見已  
隱居在武當山之南巖永樂中不知所往人以爲  
仙去